

दिनांक 12.02.2025

समय: 18.45 बजे

आकाशवाणी जयपुर—अजमेर

प्रादेशिक समाचार

- प्रधानमंत्री नरेंद्र मोदी अर फ्रांस रा राष्ट्रपति इमैनुएल मैक्रॉ आज फ्रांस रा ऐतिहासिक शहर मार्से मांय भारत रा पहला वाणिज्य दूतावास रो उद्घाटन कीनो।
- प्रदेश मांय **राइजिंग राजस्थान ग्लोबल इन्वेस्टमेंट समिट** रा तैत करी ज्या करार माथे काम करण सारू रीको तेजी ऊं जतन कर रह्यो है।
- राज्य मांय गोकुल मिशन रा तैत 29 जिलां मांय लिक्विड नाइट्रोजन भंडारण रो बूतो बधा र 93 हजार लीटर व्ह्यो।
- प्रयागराज महाकुंभ मांय माघ पूण्यू रे मौके एक करोड़ 59 लाख ऊं बत्ता जातरू पवित्र स्नान कीनो।

000

प्रधानमंत्री नरेंद्र मोदी अर फ्रांस रा राष्ट्रपति इमैनुएल मैक्रॉ आज फ्रांस रा ऐतिहासिक शहर मार्से मांय भारत रा पहला वाणिज्य दूतावास रो उद्घाटन कीनो। इण ऊं पैली दोन्यू नेता शहर रा भारतीय समुदाय रा लोगां सागे बातचीत कीनी। दोन्यू रो अंतर्राष्ट्रीय थर्मोन्यूक्लियर प्रायोगिक रिएक्टर परियोजना रो दौरा करण रो ई कार्यक्रम है, जो खास वैश्विक पहल है जिण मांय भारत अर फ्रांस शामिल है। फ्रांस री यात्रा पूरी व्ह्या पाछे प्रधानमंत्री मोदी अमरीका रा दो दिन रा सरकारी दौरा सारू रवाना व्हेला।

000

प्रदेश मांय **राइजिंग राजस्थान ग्लोबल इन्वेस्टमेंट समिट** रा तैत करी ज्या करार माथे तेजी ऊं काम कर्यो जा रह्यो है। जयपुर कने मातासुला औद्योगिक हलका मांय सोलर पीवी मैन्यूफैक्चरिंग यूनिट खोलण सारू एक गैर-सरकारी कम्पनी ने प्लॉट दिया ज्या है। इण मांय डोढ़ गीगावाट बूता रा सोलर पीवी मॉड्यूल बणाया जावेला। उद्योग अर वाणिज्य विभाग रा प्रमुख शासन सचिव अर रीको रा चेयरमैन अजिताभ शर्मा कह्यो के रीको री ओर ऊं निवेशकां ने सागे ले र ज़मीं आवंटन समेत वां री न्यारी-न्यारी जरूरतां तेजी ऊं पूरी करण बाबत काम कर्यो जा रह्यो है।

000

कांग्रेस रा नेता अर विधायक सचिन पायलट राजस्थान लोक सेवा आयोग मांय बदलाव री जरूरत बतायी है। आज जयपुर मांय खबरनवीसां सागे बातचीत करता थकां श्री पायलट कह्यो के लारला कुछ बरसां मांय आयोग रा कामकाज माथे उठायी ज्या सवालां ऊं नौजवानां रो पूरी व्यवस्था ऊं भरोसो उठ ग्यो है। वे कह्यो के राज्य सरकार ने ई बारा मांय तुरत कार्यवाही करणी चाहिजे।

श्री पायलट राज्य रा कृषि मंत्री किरोड़ी लाल मीणा कानी ऊं फोन टेप करण रा आरोप वाळा बयान ने गंभीर मामलो बतायो। वे कह्यो के फोन टेप करण रा आरोप रा मामला मांय सरकार ने जवाब देवणो चाहिजे। पायलट कह्यो के गैर-कानूनी तरीका ऊं फोन टेप करण रा मामला री जांच कर र ज़िम्मेदार लोगां रे खिलाफ कार्रवाई करी जावणी चाहिजे।

000

राज्य सरकार बारां पंचायत समिति री सीमली ग्राम पंचायत री सरपंच संगीता अहीर अर उप सरपंच नरेश कुमार ने मुअत्तल कर दीना है। आं दोन्यू माथे मिलीभगत ऊं ग्राम पंचायत री ज़मीं रो फर्जी

पट्टो बणा र पंचायत ने नुकसान पूगावण रो आरोप है। पंचायतीराज मंत्री मदन दिलावर ई मामला री जांच करायी। जिला परिषद् रा सीईओ राजवीर सिंह बतायो के जांच पाछे महकमो दोन्यू ने मुअत्तल करण रा हुकम जारी कर दीना।

000

भारतीय रिजर्व बैंक सरकारी कामकाज सारू सेवा देवण वाळा सगळा बैंकां ऊं 31 मार्च 2025 ने सगळी शाखावां खुली राखण री राय जारी कीनी है। केन्द्रीय बैंक ने ई बाबत केन्द्र सरकार ऊं अरज मिली है। रिजर्व बैंक ई बारा मांय सगळा बैंकां ऊं प्रचार-प्रसार करण बाबत ई कह्यो है।

000

प्रदेश मांय राष्ट्रीय गोकुल मिशन रा तैत 13 जिलां मांय लिक्विड नाइट्रोजन रा भंडारण सारू तीन हजार लीटर बूता रा साइलो आज वर्चुअल तरीका जनता ने सूपी ज्या। पशुपालन मंत्री जोराराम कुमावत इण री सरूआत करता थकां बतायो के लिक्विड नाइट्रोजन पशु नस्ल सुधार सारू कृत्रिम गर्भाधान रा काम आवे है। ई भंडारण व्यवस्था सारू राज्य रा 16 जिलां मांय तीन-तीन हजार लीटर बूता रा वर्टिकल साइलो पैली ई लगाया जा चुक्या है।

राज्य रा 29 जिलां मांय वर्टिकल साइलो बण जावण ऊं लिक्विड नाइट्रोजन भंडारण रो बूतो 93 हजार लीटर रो व्हे ग्यो है। ई मौके पशुपालन मंत्री जयपुर जिला रा मैत्री कार्यकर्तावां ने ए आई किट री दीना। श्री कुमावत बतायो के जैसलमेर मांय कृत्रिम गर्भाधान कवरेज ने बधावण सारू मिशन उत्कर्ष जैसलमेर चलायी ज्यो है।

000

झुंझुनू जिला मांय टी.बी. री बीमारी री रोकथाम सारू बेगो ई एडल्ट बी.सी.जी. वैक्सीनेशन कैंपेन चलायो जावेला। ई बारा मांय जाणकारी देवण सारू आज जिला मुख्यालय माथे नर्सिंग विद्यार्थी रैली निकाळी। झुंझुनू रा सी.एम.एच.ओ. डॉ. छोटेलाल गुर्जर बतायो के टीका लगवावण सारू 71 हजार ऊं बत्ता लोग नाम मंडाया है अर टीका लगवावण रो काम बेगो ई सरू कर्यो जावेला।

000

अर अब खबरां महाकुम्भ री —

प्रयागराज मांय चाल रह्या महाकुंभ मांय आज माघ पूण्यू रे मौके एक करोड़ 59 लाख ऊं बत्ता जातरू संगम मांय आस्था री डुबकी लगायी। माघ पूण्यू रा दिन गंगा, यमुना अर सरस्वती रा संगम री ठोड़ स्नान करणो शुभ मान्यो जावे है। महाकुम्भ मांय हाल ताई 47 करोड़ 55 लाख जातरू स्नान कर चुक्या है। प्रदेश मांय ई आज माघ पूण्यू रे मौके जातरू पवित्र सरोवरां मांय स्नान कर र मिन्दरां मांय पूजा-अर्चना कीनी। ई मौके मिन्दरां मांय खास धार्मिक आयोजन ई राख्या जा रह्या है। डूंगरपुर जिला मांय चाल रह्या बेणेश्वर मेळा मांय ई मोटी तादाद मांय जातरू पूग्या। बेणेश्वर धाम रा पीठाधीश्वर अच्युतानंद महाराज सागे मोटी तादाद मांय जातरूआं री ओर ऊं पालकी यात्रा निकाळी ज्यी। सोम, माही अर जाखम नदियां रा संगम रा आबू दर्रा घाट माथे जातरू शाही स्नान कीनो। सवाईमाधोपुर जिला मांय रामेश्वर धाम रा त्रिवेणी संगम मांय ई तड़के ऊं स्नान अर दान पुण्य करण सारू मोटी तादाद मांय जातरू पूगण लाग्या।

000

आर्य समाज रा संस्थापक अर समाज सुधारक महर्षि दयानंद सरस्वती री जयंती रे मौके आज वां ने सिरधाभाव सागे याद कर्या जा रह्या है। प्रधानमंत्री नरेंद्र मोदी सोशल मीडिया पोस्ट रे जरिये कह्यो के भणार्ई-लिखार्ई माथे खास ध्यान देवण अर महिलावां ने मजबूत बणावण सागे भारत री विरासत अर संस्कृति ने बचावण रा मकसद ऊं महर्षि दयानंद री कोशिशों हमेशा प्रेरणा देती रहेवेला। मुख्यमंत्री भजनलाल शर्मा ई सोशल मीडिया संदेश मांय कह्यो के स्वामी जी रा विचार

युगां—युगां ताई सगळां ने देश री सेवा करण री प्रेरणा देता रेहवेला। आज ई 14वीं सदी रा महान संत रविदास री जयंती ई है।

000

प्रदेश मांय अब दिन री बगत गर्मी महसूस व्हेवण लागी है। मौसम विभाग रे मुजब प्रदेश रा घणखर हलकां मांय अधिकतम तापमान 25 ऊं 33 डिग्री सेल्सियस बीचे दर्ज कर्यो जा रह्यो है। लारला चौबीस घंटा मांय सब ऊं बत्तो 33 डिग्री सेल्सियस तापमान बाड़मेर मांय रिकॉर्ड करी ज्यो। मौसम केन्द्र जयपुर रा निदेशक राधेश्याम शर्मा बतायो के घणखर ठोड़ां दिन री बगत पारो सामान्य औसत ऊं ऊंचो चाल रह्यो है।

000

प्रदेश मांय आज व्ह्या न्यारा—न्यारा सड़क हादसां मांय सात जणा री मौत व्हे गयी अर सोलह जणा ज़ख्मी व्हे ग्या। सिरोही ज़िला रा स्वरूपगंज हलकां मांय आज एक ट्रक कानी ऊं ऑटो रिक्शा ने टक्कर मार देवण रे कारण चार जणा री मौत व्हे गयी अर 9 जणा ज़ख्मी व्हे ग्या। तीन घणा ज़ख्मी लोगां ने आबूरोड रैफर करी ज्यो है। ट्रक मांय लोहा री भारी मशीन राखी ज्यो ही। कोदरला कने ट्रक आगे चाल रह्यो ऑटो रिक्शा ने टक्कर मार दीनी। ई दौरान ट्रक मांय पिछाड़ी रख्योडी मशीन केबिन तोड़ र बाहर आ गयी। इण ऊं ट्रक रा ड्राइवर अर खलासी री मौत व्हे गयी। धौलपुर ज़िला रा मनिया हलका मांय सुआ का बाग कने मोटरसाइकिल सवार तीन जणा ने एक गाड़ी टक्कर मार दीनी, जिण ऊं तीन्यू री मौत व्हे गयी। पाली ज़िला मांय माण्डा गाँव कने मेटाडोर पलट जावण ऊं सात जणा ज़ख्मी व्हे ग्या।

000

राज्य मानव अधिकार आयोग री ओर ऊं कानून री भणार्ई करण वाळां ने खास मुद्दां माथे पन्द्रह दिन री सिखावण देवेला। आयोग रा अध्यक्ष न्यायमूर्ति जी आर मूलचंदानी आज जयपुर मांय सिखावण रा ई कार्यक्रम री सरुआत कीनी। ई मौके वे कह्यो के मानवाधिकारां री हिफाजत मांय वकीलां रो खास काम व्हे है।

000